

16. maj 2019

UPA 2019/176

Qaanaami kulturimik toqqammaveqartumik immikkuullarissumillu piniariaatsit kinguaariinnut aggersunut iluaqtissatut qanoq ililluta tammatsaalineqarnissaannik qulakkeerinnissinnaanerput pillugu apeqquteqaat aallaavigalugu oqallinnissamik siunnersuut.

(Inatsisartunut ilaasortaq, Mikivisuk Thomassen, Inuit Ataqtigiit)

Inuit Ataqtigiit sinnerlugit Inatsisartunut ilaasortaq Mikivisuk Thomassen apeqquteqaat aallaavigalugu oqallinnissamik siunnersuutaa Siumumiik imaattumik oqaaseqarfigissuarput.

Ukiut tallimat qaangiussimalerput Qaanaamiik Pituffimmut qimussimik Iterlassuakkoorluta ikaaratta. Angallavimmi isorartoqisumi avinngarusimaqisumilu issittorsuusoq piniartut marluk qimussersaraagut. Silaannaap allanngoriartornera tunngavigalugu aqqut imaannaanngeqisoq ingerlavigalugu piniagassat nunatsinni pinngorarfissuat qimussimik ingerlaarfigaarput. Angalaneq taanna uannut misigisaavoq immikkuullarilluinnartoq, pikkunartumik nuannersumillu inuuninni puigunngisaannagassara. Taamani misigaara pinngortitaq peqqarniitsoq piniagassarpassuaqartorli. Aarrit, arferit, qilalukkat, nannut, tuttut, puisit, timmissat allallu uumasorpasuit Inughuit inuussutigivaat.

Avanersuarmi piniartut ikittunnguupput ileqqutoqqallu malillugit piniarneq ingerlanneqartarpoq, taamaakkaluortoq nunat tamalaat akornanni isumaqatigiissutit tunngavigalugit ikitsuarsuarnik piniartut pisassinneqartarput naak peqassuseq aarlerinangitsumik inissisimasutut isikkoqaraluartoq. Nunami issittorsuarmi peqqarneeqisumi kaperlattartumilu pinngortitaq nammineerluni killilersuisarpoq, piffissap taamaalinerani minnerunngitsumik qimminut nerisassaqarniarneq ajornartorsiutaasinnaasarpoq tupinnangitsumillu qimmit qimuttut ukiuni kingullerni Avanersuarmi ikiliartupiloorput, tassami avannaarsuani isseqisumi qimmip qimuttup pisariaqartippaa kimittuunik nerisaqarnissaa pisariaqaraluarpoq soorlu aarrit neqaannik. Pissusiviusulli qiviaraanni piniartumut qimuttunik qimmilimmut aarrinik nannunillu pisassiissutit naammanneq ajorput agguaqatigiissillugu ukiumut pingasuinnarnik pisaqarsinnaatitaagamik.

Soorlu qulaani oqaatigingiga Avanersuaq uumasorpasuit erniorfigingaat, taamaattumillu qilalukkat qernertat amerlasoorpassuullutik ingerlaaqatigiittarput.

Siumumi siunnersuuteqartoq isumaqatigivarput Avanersuarmi ileqqutoqqat illersortariaqarpagut soorlu qaannamik sakkutoqqanillu qilalugarniarneq uumasunillu allanik piniartarneq eqqarsaatigalugu tamannalu qulakkeerniarlugu aporfiit qulaajarlugillu siunissami aporfiujunnaarnissaat sulissutigisariaqartoq Siumumi isumaqarpugut.

Doris Jakobsen Jensen, Siumut